

24. Oktober 2017

UKA 2017/41

**Eqqumiitsuliornerup inuussutissarsiutitut, siunissamilu nunatsinni, nunattalu avataani niuernikkut tunisassiatut nunattalu avammut nittarsaanneqarnerannut iluaqutaanerulersinneqarnissaa, oqilisaavigineqarnerulernissaallu qanoq ililluta suliniuteqarsinnaanerput pillugu apeqquteqaat aallaavigalugu oqallisissiatut siunnersuut.**  
(Inatsisartunut ilaasortaq Peter P. Olsen, Inuit Ataqtigiit)

Siullermik Siumut-miit oqallisissatut saqqumiisoq qujassuteqarfigissavarput.

Siumumiit nunatsinni eqqumiitsuliornermik pinngorartitsisut inuiaqatigiinni kinaassutsitsinnut, aallaavitsinnillu pingaartitsillutik aallussisuunerat piorsarsimassutsitsinnillu tunngavitsinnik noqitsisuunerannik pingaartillugit ataqquarpavut.

Pingaartilluinnarlugu sineriassuatsinni isortoqisumi tamatta siamasissumik inooriaatsillu assigii-nngisitaartut aallaavigalugit inuusugut, tamanna aamma inuiaassutsimut ilisarnaataasoq tunnga-vigalugu eqqumiitsuliornikkullu aamma ilisarnaatigigipput Siumumit isumaqarpugut.

Ullutsinni eqqumiitsuliornikkut killiffik amerlasuutigit pitsaasorpasuaqarpoq. Pingaartumik inatsisi-tigit aningaasatigit aammalu periarfissatigit pitsanngorsaanerit annertuut pisimapput, tamannalu tulluusimaarutissaavoq. Siumumiillu isumaqarpugut suli alloriaqqinnissamut annertuunik periarfis-saqartugut.

Piorsarsimassuseq tunisassiatut isigalugu, tunisassiaq kinaassutsitsinnut, oqaluttuarisaanitsinnut suminngaanneernitsinnillu ersersitsisoq, imaqartorlu, tamanik nunarsuarmioqatitsinnit assigneqa-nngitsoq, qanganisaaq, nutaarlu, ataatsimoortillugit tassaavoq nukittuumik immikkuullarissumillu tunisassiorneq.

Siumumiit isumaqarpugut suli sakkortunerusumik annertusisamillu eqqumiitsuliornikkut periarfissat aamma nunat allat eqqarsaatigalugit pilersaaruteqartariaqartugut. Aamma eqqumiitsuliornikkut, pinngorartitsisullu tamat peqatigalugit. Soorlu: Nunani allani sinniisoqarfitsinni aamma “ullut tamaa-sa” tamanna tuniniarneqartariaqartoq, nalinginnaasumillu suliffeqarfissuit kisiisa aallaaviginagit, aammalu eqqumiitsuliornikkut pinngorartitsisut tassuunakkut aamma “tunisassiatut” aqutissiuun-neqarlutik.

Siumumiit peqataaffigerusupparput nunatta avammut qanoq iliuuseqarneri tamaasa aamma isumaqartassasoq eqqumiitsuliornikkut sassaalliineq, takutillugu misigitillugulu nunarput inuilu aammalu piorsarsimassutsikkut pisuussuterput qanoq siammasitsigalunilu kusanartigisoq, tamattalu qanoq annertutigisumik tulluusimaarutigigipput.

Siumumiit pingaartilluinnarparput eqqumiitsuliorneq nunatsinni inuussutissarsiutitut pitsaasutut periarfissatullu aamma nutaatut aqquassaasariaqartoq. Taamaattumillu aamma inatsisitigut suli eqaallisaanissaq eqqartugassatut isigaarput, pingaartumik nunatsinni sumiiffippassuarni, pingaartumik illoqarfinni avinngarusimasuni nunaqarfinnilu unamminartut amerlavallaarput ulluinnarnilu eqqumiitsuliornikkut aallaaveqarluni aallartisarniartunut ipititsisartut.

Nunatta iluani eqqumiitsuliortutut pinngorartitsisutut inuussutissarsiuteqarnissaq ajornannginnerusariaqarpoq. Amerlavallaatigut takusarparput pingaartumik nipilersortartut, qalipaasartut, isiginnaartitsisartut sanaluttartut suliarninnik tunisaqarniassagunik, akinik samungarujussuaq appaasariaqartartut arlaatigut tunisaqarniassagunik naggataatigut inuussutigisinnaajunnaarlugit suliatic, naak pitsaassuseq ajoquteqanngikkaluartoq amerlasuutigut. Tamanna iliuuseqarfigissallugu pingaaruteqarpoq siuariaatinik pitsaasunik tullegassappat, aamma eqqumiitsuliornikkut inuussutissarsiuteqarnissaq inuusuttunut maanna inerikkiartortunut arlaatigut soqutiginaateqassappat.

Taamatut oqaaseqarluta, oqallisissiamut imartuumut qujavugut.

Knud Kristiansen

Siumut